

L A  
**REDVCTION**  
 DE LA VILLE DE  
**MONTAVBAN**  
 A L'OBEISSANCE DV ROY.

*Avec les articles accordez aux habitans de par sa  
 Majesté par Monsieur le Marechal de Themines.*




**A PARIS,**

Par Fleury Bourriquant, au bout du Pont S. Michel,  
 en l'Vniuersité, aux Fleurs Royales,

E T

En sa boutique en l'Isle du Palais, vis-à-vis des  
 Augustins, à semblable enseigne.

*Avec Permission,*



# AV ROY,

## S O N N E T.

**S**I RE, en fin vos labours, vos travaux, & vos  
armes  
Ont reduit, ont dompté, & mis bas iustement  
Les villes & les cœurs qui orgueilleusement  
Contre vous recerchoient de Bellonne les charmes.

Ouy, SIRE, vos labours, & vos iustes alarmes,  
Conduites par tous lieux d'un docte iugement,  
Vous ont fait remarquer en ce bas élément,  
Pour aller à l'esgal du Maistre des gens d'armes.

Aussi les tourbillons esleuez contre vous,  
A l'estre d'un instant se sont rendus si doux,  
Que vostre Majesté(encline à la Clemence)

Leur a voulu monstrier, comme un pere discret,  
Que donner le pardon, n'est pas plus bel effect,  
Qu'un simple à se tenir dedans l'obeissance.

*La Reduction de la ville de Montauban,  
à l'obeïſſance du Roy.*

**M**ONTAUBAN, ville con-  
ſtruiſte ſur la croupe  
d'une colline, ſur le  
panchement de laquel-  
le a eſté baſty vn Pont  
de grande eſtenduë, à cauſe de la ri-  
uiere du Tar qui paſſe deſſoubs, n'é-  
toit du temps du Pape Iean XXII.  
natiſ de Cahors en Quercy, qu'un pe-  
tit Chateau de peu de conſequence,  
lequel neantmoins, en faueur de ceſte  
naïſſance, fut érigé en Eueſché, & du  
depuis par ſucceſſiô de temps & d'an-  
nées conuert y en vne ville, telle que  
la trop grande clemence de nos Roys  
a tolléré.

Sa ſcituation eſt tres-commode,  
eſtant ſur le grand chemin de Thou-

louze à Limoges, & à Paris: & en consideration de ce que la riuere est du tout necessaire pour les marchands: Aussi ceste place ayant ressemblé aux pepinieres, qui ombragent & fructifient par laps de temps; de mesme elle s'est amplifiée, accreuë, & fortifiée, non seulement au preiudice des villes & citez circonuoisines, mais au détrimet de l'Estat Monarchique, qui n'a sceu ny peu dompter les habitans, pour s'eltre rendus par trop forts & par trop aguerris.

Soubs le regne de Charles VII. elle souffrit vn siege assez rude & violent, & Popiniaistre rebellion des habitans d'icelle prouoquerent de telle sorte le courroux de ce braue Roy, que n'eust esté Estienne de Vignoles, & Poton de Xaintailles, Capitaine des Gascons, qui demeurèrent sur la place en vne escarmouche qui se fit, (ce qui



5

refroidit les plus courageux soldats )  
elle eust esté demantelée.

Telle resistance a tousiours vescu  
dans les ames de ces habitans , ayant  
esté continuellemēt nourris dans vne  
Religion pleine de méfiance, & neant-  
moins ladite ville fut défermée de ses  
murailles par les Catholiques, lors que  
le Roy Charles I X. fit le voyage de  
Bayonne, & peu de temps apres, elle en  
fut reuestuë par les mesmes faction-  
naires de la Religion pretenduë refor-  
mée: Elle a souffert d'estre assiegée par  
trois fois; à quoy elle a tousiours resi-  
sté, & neantmoins eust seruy de tro-  
phée à la valeur du Mareschal de Môt-  
luc, sans d'autres nouuelles affaires qui  
suruindrent en France, qui occasion-  
nerent de leuer le siege.

Le 20. du mois d'Aoust de l'année  
1621 le Roy qui auoit entrepris de sub-  
juguer tout les rebelles de son Royau-

me, apres auoir reduict la ville de S. Iean d'Angely en son obeïſſance, puny Clerac de ſon opiniaſtreté, (non avec telle rigueur qu'eſtoit le demerite de ſa faute) & voyant que les habitans de Montauban ſ'aſſeuroient fort ſur l'aſſiete de leur ville, & ſur les fortificatiōs qu'ils auoient faites depuis la publication de l'Edict de Nantes, il y planta le ſiege en perſonne, aſſiſté des plus braves & courageux Princes & Seigneurs de la Cour; & pour la forcer, y fit drefſer force batteries, où pendant deux mois, chacun qui auoit l'honneur de commander en l'armée, faiſoit à qui mieux mieux au faiſt de la milice.

Deſſunēt Monsieur le Duc de Mayenne trouua les moyens de deſcouvrir les aſtuces plus malicieuſes des aſſiegez, & porté d'vn courage tout fidelle au ſeruice de ſon Roy, ayant eu aduis qu'ils auoient fait vne demie lu-

ne, fort preiudiciable à sa Majesté, il se transporta au Camp luy troisieme, pour voir l'entreprise, où estât descouvert par ces malheureux rebelles, il fut tiré d'une mousquetade, laquelle l'ayant frappé à l'œil, le fit choir mort sur la place, ou peu s'en fallut, au commun regret & mescontentement de toute l'armée.

Ce malheur arriué, & sceu du Roy, sa Majesté en ietta des larmes, & protesta sur le champ de s'en vanger; à quoy tous ceux qui portoient les armes pour son service se roidirent avec tant de zele & tant d'affection, qu'en moins d'un mois il se fit bresche, quoy que lesdits assiegez montraissent souuent qu'ils estoient grandement exercez au faict de la guerre, & combien que d'autres factionnaires leur enuoyassent du secours: Tellement que la resolution estant prise de les forcer, les batteries

furent renforcées; Monsieur le Duc de Chevreuse s'y rendit tres-vigilant, Monsieur de Bassompierre sauua le coupe-gorge des gens du Roy; bref, en indignation de la perte d'un si grand Capitaine, les effectz Martiaux furent si sanglans sur ceste nation opiniastre & rebelle, qu'elle ne faisoit iamais sortie, qu'il n'en demeura un bon nombre sur la place.

Ainsi les habitans de Montauban ont esté assiegez & pressez l'an passé par la valeur de nostre inuincible LOUIS XIII. luy present, au milieu du grondement des canonades, à la teste des hazards & des perils de la milice; & ce mesme an eussent esté forcez par la Iustice de ses armes, sans l'iniure de la saison de l'Hyuer qui approchoit, fort contraire à ceux qui tiennent la campagne, à cause du pays, qui est un peu marecageux: de maniere qu'à ceste

occa-



occasion, la Majesté (qui iugea que les soldats ne pouuoient pour la rigueur d'une telle saison souffrir d'avantage la fatigue) fit leuer le siege de deuant la dite ville de Montauban, & de là s'en alla passer par Monheur, où elle trouua les portes de la ville closes à les commandemens, & les cœurs des habitans souleuez contre l'obeissance.

Ie ne m'arrestera point sur le fac qui en fut fait, ie me retiendray dans les bornes seules de nostre discours, & de nostre relation de la ville de Montauban, laquelle encores qu'elle eust semblé par sa force faire leuer le siege, neanmoins elle ne laissa d'estre inuestie par quatre ou cinq mil hommes, tant de pied que de cheual, commandez par Monsieur le Duc de Vendosme, la vigilance & le courage desquels a tousiours apporté tant de nuisance à ceux de dedans, que depuis ce temps à peine

ont-ils peu recouurer aucuns viures pour se renuitailler, ou du moins s'ils ont esté à quelque picorée, ç'a esté tellement à leurs despens, que plusieurs d'entr'eux y ont laissé les bottes & les estriers.

Ceste opiniastre rebellion a voulu durer pendant vn long temps, estimât que les armes du Roy se lasseroient rât contre eux que contre leurs confreres & associez : Mais en fin ayant preueu que les Grands recherchoient la seureté de leurs biens, de leur honneur, & de leur vie, dans la clemence, & dans la misericorde du Roy, ayant veu Monsieur de Rohan soubmis à ce que son deuoir le tenoit obligé, veu Montpellier flechir aux pieds de sa Majesté, Nismes, Castres, Vzés, & le reste du Lâguedoc, elle avoulu marcher d'vn mesme brâle aux charges & conditions telles, que le Roy leur auoit fait assauoir ; si bien

que par le traicté qui s'est fait pour ce  
 subject, sadite Majesté plus portée cét  
 fois dans ses inclinations naturelles, que  
 dans les iustes ressentimēs qu'elle pou-  
 uoit auoir d'une orgueilleuse rebellion  
 de ses subjects, tous ceux de la Religion  
 pretenduë reformée, qui ont porté les  
 armes contre son seruice, & qui ont te-  
 nu bon dans les Villes & Chasteaux de  
 ce Royaume, au preiudice de la souue-  
 raineté Monarchique, & sans d'autre  
 autorité que de leur propre mouue-  
 ment, ont obtenu generally le  
 pardon de la faute commise, & par ain-  
 si ont esté remis en la protection &  
 sauuegarde du Roy, & sous la faueur  
 du benefice des Edicts pour le faict de  
 leurs consciences, auquel traicté sadite  
 Majesté a tousiours voulu & desiré  
 que les habitans de Montauban & de  
 la Rochelle fussent compris, pourueu  
 que dans le temps stipulé, & contenu



par les articles, ils se missent en leur devoir, & rendissent pareille obeïssance que les autres: A quoy ceux de Montauban, qui se voyoient d'autre part oppressez par la necessité des viures, & despourueuz de chef & de conduite, se sont volontairement inclinez peu apres la paix publiée en Languedoc & en Gascongne.

La declaration du Roy fut publiée à ceste fin au Parlement de Tholoze, & enuoyée par toute la Prouince pour estre leuë & enregistrée, & le lendemain de la Toussaincts dernière, ledict Parlement deputa Monsieur Favre pour la porter aux habitans de Montauban, lequel auparauant que de s'y transporter, passa par Castel-Sarrazin, pour trouuer Monsieur le Marechal de Themines, afin de luy faire entendre sa legation, & s'il en trouuoit bon la procedure: Donc ayant eu responce



fauorable à son dessein, il pourfuiuit son chemin vers Montauban, iusques là qu'estant pres de la ville, il enuoya sçauoir aux habitans s'ils desiroient d'entendre à sadite legatió, qui n'estoit autre, sinon qu'il estoit porteur de la declaratió du Roy, laquelle contenoit en mots exprés le bien & le repos vniuersel de la France, & que le Parlement l'auoit député pour leur faire assauoir ce qu'en estoit: Ce qui ne fut à peine proposé, qu'on le fit entrer dedans la ville, & aussitost fist-on lecture de ladite declaration, apres quoy il fut tenu conseil, pour voir & iuger s'il estoit à propos pour leur interest d'y acquiescer: en quoy le S. Esprit opera beaucoup en peu d'heure, car tous d'une mesme voix trouuerét bon que ladite declaration fut enregistrée & publiée par tous les coings & carrefours de ladite ville de Montauban, & que l'on

criast viue le Roy: ce qui fut fait sur le champ sans d'autre remise; & en resjouissance de ce, furent allumés des feux de ioye par toutes les ruës, & furent tirez douze ou quinze volées de canó, reïterant les cris d'allegresse, Viue le Roy: Ce qui fut le 2. du present mois de Nouembre 1622.

Le lendemain 3. Nouëbre, deux Cōsuls de la ville, assistez de 30. ou 40. des principaux habitans s'en allerent à Castel Sarrafin trouuer M<sup>r</sup> le mareschal de Themines, portant la voix de tout le corps, afin de faire les excuses de leur rebellion au mieux qui leur fut possible: De sorte que depuis ce temps, tous messagers & autres personnes ont eu la liberté d'aller & venir par les chemins de ce costé-là, mesmes dans ladite ville de Montauban, avec autant d'asseurance comme on auoit auparavant les troubles.

Pour ladite Reduction, ils enuoyèrent aussi pardeuant ledit sieur mareschal de Themines leur Sergēt major, lequel outre la charge qu'auoient lesdits Cōsuls & habitans, il l'assura particulièrement de toutē sorte d'obeissance & de respect enuers sa Majesté, & luy fist offre des clefs de la ville, pour venir quand il luy plairoit faire exécuter les articles de la paix, qui ne sont autres, à l'esgard de Montauban, que toutes les fortifications serōt abbatuës, ne deuant rester que les murailles & les fossez: Pour assurance dequoy, & pendant qu'on y trauaillera, afin qu'il ne s'y face aucune reuolte, comme il arriue par fois parmy vne insolēte populace, douze habitans des principaux de la ville doiuent estre baillez en hōtage.

A ceste fin Monsieur le Duc d'Espernon y doit arriuer en peu de iours,

ayant commandement expres de sa Majesté de faire executer de poinct en poinct le contenu aux articles accordez par sadite Majesté à tous ses subjects, faisant profession de la Religion pretenduë reformée.

Par ainsi, & puis que les cœurs de tant de rebelles endurcis dans vne ingrate opiniastrété, se sont amolis sous le ioug des douces & benignes Loix de nostre Roy, il est à croire que les Rochelois se mettront bien tost en leur deuoir, & qu'ils recognoistront ingenuëmēt en public & en particulier combien grieue est l'offence qui est cōmise contre celuy qui nous est donné de Dieu pour nous regir & gouverner, & principalement contre son oingt, le fils aîné de son Eglise, à qui les Lys ont esté enuoyez du Ciel, pour seruir de miroir dedans ses armes de sa valeur & de sa douceur.

F I N.